



Sabtu, 18 Maret 2023
Ogen: Lukas 14:28-30



Erbahan Anggaren Biaya



Wari arsitek nasional iperingeti wari enda guna nginget jasa arsitek si enggo ikut mbangun tanah air Indonesia. Ngergai karya-karyana i bas bangunena ras pembangunena nasional subuk i bas bentuk bangunena, monument subuk desain si bersejarah bage pe bangunena masa genduari enda. Tentuna enda merluken kepintaren ras keahlin si mbelin maka karya ras rancangenna enda mehuli ulihna dingena erguna rikutken fungsina.

Pengajaran Yesus man ajar-ajarNa kuga ras sarat jadi ajar-ajar Yesus labo menukah. Ibahan Yesus anding-andingenna desken kalak mbangun Menara. Labo lit bangunena siirencanaken la alu perhitungen (taksasi) si jelas. Sabap adi la alu perencanaan si mehuli banci jadi bangunena lolo (mangkarak) sabap la ngasup ia ndungisa la sue galang bangunena ras belinna duit si iperluken i bas mbangunca. Kerina kai siilakoken alu perhitungen si jelas amin banci saja i bas perdalanenna salah perhitungen tapi silanglangna enggo iukuri rikutken kai si enggo irencanaken.

Gambaren enda me ipake i bas kalak siatena nguikutken Yesus, arus itandaina bana, ngasup ia ngkelengi Dibata lebihen asangkan ia ngkelengi dirina jine bage pe anak jabuna, senina turangna ras orangtuana.

Ngikutken Yesus arus alu cara si terprogram, mbages pengukuri, alu pertimbangan ngasup ngampar bana, mersan kayu persilangna, alu bage ia setia ngkit Yesus seh kedungenna. La ngadi i tengah dalan, surut ntah pe jadi penghianat sabap la seri ras siukuri ras arapkenna kai si jadi i bas perdalanenna ngikutken Yesus. Kecewa ia, tegun si lolo si ibentasina. E maka, perlu kal kerina si ilakoken kita mbages siukuri ras meriah ukurta ndalankenca. Alu bage terpuji Dibata, la tercurna gelarNa si bahan.